



16. april 2019

UPA 2019/159

Naqqiut

Siunnersuut imm.159. 11. februar 2019-meersoq taarserpaa
(Siunnersuuteqartup atia allanngorpoq)

Inatsisartut suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Sumiginnaanerit annikillisarniarlugit, innuttaasut peqqissusiat qaffassarniarlugu innuttaasullu akiitsoqalertarnerat annikillisinniarlugu, pisortanit ikiorsiissutinik atugarissaarnissamullu pisortanit pisartakkanik allanik pisartagallit, pisartakkatik imigassanik, aanngajaarniutinik, pinnguaatinut atornerluinernullu allanut atornagit, annerusumik aningaasartuutitut ataavartunut, soorlu ineqarnermut, kiassarnermut imermullu, paaqqinnittarfinnut, meeqqanut akilersuutitut, akileraarutitut tapissanut nerisassanullu atuisalernissaannut sakkortusisamik qanoq suliniuteqarsinnaanersugut apeqquteqaat aallaavigalugu oqallinnissamik siunnersuut.

(Inatsisartunut ilaasortaq Siverth K. Heilmann, Atassut)

Annerusumik annikinnerusumilluunniit pissuteqarluta suliffeqanngikkaangatta pisortaniit aningaasarsiaqartinneqartarpugut, atugarissaarnerpullu qularnaarniarlugu soraarnerussutisianik pisortanillu ikiorsiissutinik allanik tigusaqartarluta. Ajoraluartumillu inoqateqarpugut pisortanit ikiorsiissutinik assigisaannillu pisartagalinnik timikkut tarnikkullu anniaateqarlutik suliffeqarfinnut appakaaneq ajuleqqasunik. Tamattalu isumaqataaffigisinnaagunarparput taamatut inissisimalersimasut sapinngisamik ikinnerpaanngortittariaqaratsigit.

Ajoraluartumillu oqaatigisariaqarparput taamatut inissisimalersimasut ilaat aamma atornerluisunngortarmata, pisortanillu ikiorsiissutit pisortanilluunniit pisartakkat allat inuuniarnermut, nerisassanut allanullu pisariaqartunut atugassaraluatik, imigassarsiniutissatut atornerluinernullu allanut atorinnaasarlugit.

Taamaattorli pisortanit ikiorsiissutinik pisortanilluunniit pisartakkanik allanik pisartakkaminnit anertuumik imigassarsiniartoqartartillugu aanngajaarniutinilluunniit pisiniartoqartillugu, meeraqarunillu ilaqutaqarlutilluunniit sumiginnaanermik kingunilimmik, taakku qanoq iliorluta ikiorserniarinnaavagut? Killilersinnaanngilagummi aalajangiillutalu taakku aningaasat sumut atorneqassannginnersut, imaluunniit taamaalorsinnaavagut taamaaliortariaqarlutalu? Akuersaaginnartuassavarput pisortanit ikiorsiissutit aalajangersimasumik aningaasartuutitut atorneqaratik imigassanut, aan-



ngajaarniutinut, pinnguaatinut atorneerluinernullu allanut atorneqartuassappata? Akuersaaginnartuas-savarput pisortanit ikiorsiissutit innuttaasut peqqussusiannik ulorianartorsiortitsisunut atorneqartu-assappata? Akuersaaginnartuassavarput pisortanit ikiorsiissutit innuttaasunut tunniunneqartut mee-qanik inuusuttuaqqanillu sumiginnaanermik kinguneqartunut atorneqartuassappata?

Isiginnaaginnarnerput killeqartariaqarpoq, minnerpaamillu iliuuserisinnaasarput tassaavoq pisortanit ikiorsiissutinik allanilluunniit pisartagaqaraanni piumasaqaateqartarnissarput. Tusaarusupparputtaaq qanoq iliornikkut pisortanit ikiorsiissutit allatulluunniit pisartakkat, aningaasartuutitut aalajanger-simasunut atorneqaratik, annertuumik imigassanut, aanngajaarniutinut pinnguaatinullu, pissusiler-suutinullu allanut peqqissutsimik innarliisinnaasunut sumiginnaanermillu kinguneqartartunut, atorneqalersimappata allatut qanoq iliuuseqarsinnaanerluta, akisussaassuseqartumik atugarissaarnissamut tunngavissanik pilersitsinikkut.

Naalackersuisunut kaammattuutigaarput tamatumunnga atatillugu pisortanit ikiorsiissutit imigassanut, aanngajaarniutinut, pinnguaatinut atorneerluinernullu allanut atorneqarsinnaaner at qanoq pinngitsoortinniarneqarsinnaanersoq nassuiaateqarfigeqqullugu.

Taamatut aallarniuteqarluta inerititaqarfiusumik oqallinnissaq qilanaaraarput.